

Gij Gangjvah Youqgaenj Siz Ginbingz Cungjsuhgi Cazyawj Gvangjsih Yinx Daengx Gyoengq Ganbu Vunzlai Gih Raeuz Fanjyiengj Hoenghhwd

习近平总书记视察广西重要讲话引发全区广大干部群众热烈反响

12 nyied 14 hauh daengz 15 hauh, Siz Ginbingz cungjsuhgi gonq-laeng daeuj daengz Gvangjsih Nanz-ningz、Laizbinh daengi dieg, haeujlaeg diuyenz hanghmoeg doiqrog hailangh、segi、lajmbanj、giyez daengj, caemhcaiq gangj gij vah youqgaenj de, daegbied gangj daengz Gvangjsih aeu caezcingj、cinjdeng、cienzmienh gvan-gez aen leixniemh hwnghat moq, gaemndaet gaemmaenh hwnghat youh ndei youh vaiq diuz rap daih’it neix caeuq cauhaeb aen gapgyaq hwnghat moq diuz rap canloz, aeu gij ndei swheij, aeu couqmaenh gij eiqsik caezcaemh Cunghvaz Minzcuz guh sienqmeh, gajfang swhsiengj、cauh-moq gouz bienq, coh haij guh’ak、hailangh hwnghat, roengzrengz doi-doengh dieg minzcuz henzguk hwnghat youh ndei youh vaiq, guh’ok saeh engq ndei, mboujduenh hwnghat aen Gvangjsih gyaunde yienh sevei cuji miz gij daegsaek Cungguk, guh’ok hwnghat moq, haenqrengz raiz’ok biencieng moq Gvangjsih miz yienh yendaiva Cungguk.

Gij maqmuengh cungjsuhgi caencingz naekna, hawj ganbu vunzlai daengx gyoengq gih raeuz gig saenq-hwnj、roxnyinh gujvuj sim vunz、miz saenqsim lailai. Daihya foenfoen naeuz, aeu gag rox dawz swhsiengj caeuq hengzdoengh dungjiz daengz gij cingsaenz gangjvah youqgaenj Siz Ginbingz cungjsuhgi, engq gaenjaed doxgiet youq henz Dangcunghyangh aeu Siz Ginbingz dungzci guh haedsim de, riengzlaeng bouxdaiq-daeuz fukhwnghungmbwk roengz-rengz buekguh, aeu seizseiz yiengh-yiengh cungcig giendingh henhoh “song aen dinghlaeb”, baenzlawz cungj aeu saedguh saedyauq guh daengz “song aen henhoh”, ok rengz Gvangjsih bae cienzmienh hwnghat aen gukgya sevei cuji yendaiva、cienzmienh doicaenh Cunghvaz Minzcuz fukhwnghungmbwk.

Guh Ndei Biencieng Canj-niebak, Gyavaiq Cauhlaeb Aen Dijhi Canjnieb Yendaiva

Siz Ginbingz cungjsuhgi yinxok, doidoengh Gvangjsih hwnghat youh ndei youh vaiq, aeu guh ndei biencieng guh ok canjnieb ak, gyavaiq cauhaeb aen dijhi canjnieb yendaiva.

“Dou laebceiq youq ranghdieng Gvangjsih miz gij cienzdoengj cau-moq haenx, hai diuz roen moq guh dieg minzcuz henzguk gohgi gag’ak miz gij daegsaek Gvangjsih.” Boux dinghcanj Swcigh Gohgidingh Lij Gozcungh naeuz, yaek haeujlaeg guh aen canloz baengh gohyau hawj Gvangjsih hwnghwnj、aen canloz

baengh vunzcaiz hawj Gvangjsih ak-rengz、aen canloz aeu cauhoq doinyoengx hwnghat, gya’ak hoenx-roengz gij gisuz haedsim youqgaenj de, daemxcengj cauhaeb aen dijhi canjnieb yendaiva, dajcauh lai aen canjnieb dingxdaeuz ndaej yienh’ok gij daegsaek caeuq gij ndei Gvangjsih、gveihmoz haemq hung caeuq engq ndaej daiqdoengh haenx, gyavaiq guhbaenz swngcanjiz moq.

Boux dungjswcangj Liujgangh Cizdonz Lij Binh naeuz, Liujgangh Cizdonz dwg bouxbaegonq guh hong-goeng gangdiet Gvangjsih, de yaek gyavaiq giyez cienjhingz swnggaep, hawj giyez gaep engq sang, engq cinwnghz, engq saekheu, haenqrengz hwnghat aen giyez guh gangdiet ak miz gij saedlig doxdax caeuq suijsingz hwnghat daih’it daengj.

Boux fucujyin Swcigh Dangzyez Fazcanjban Yangz Yejcauh gangj, aeu haenqrengz doicaenh cauhoq gohgi dangznieb, cawjdaeuz haifat swngcanj gihgai oij guhdangz、genj ganq ceh ndei, gyavaiq dangznieb daezsang cizlieng、gemjnoix cingzbonj、gyalai yauqik, ok gij goengrengz dangznieb Gvangjsih cawjdaeuz bauj-cang gij ancienz gwndangz gukgya.

Laebdaeb Mbe Gvangq Doiq Ndaw Doiq Rog Hailangh, Haeuj-laeg Yungzhab Caez Laeb “It Rangh It Loh”

Siz Ginbingz cungjsuhgi daeg-bied gangj daengz, Gvangjsih aeu laebdaeb mbe gvangq doiq ndaw doiq rog hailangh.

“Gvangjsih dwg dieg baihnaj caeuq conghcueng guk raeuz yienq Dunghmungz hailangh doxgap de, gij diuzgen、gij ak gaenxmaenx fugsah hwnghat Aen Minghyinh Caezcaemh Cunghgoz–Dunghmungz youh ndei youh yienhda.” Boux fucujyin Swcigh Fazcanj Gajgwz Veij Nungz Bingh gangj, aeu ciuq gij cingsaenz cijsi Siz Ginbingz cungjsuhgi youqgaenj de, cienzlig doicaenh hwnghat diuzloh luz haij moq, cienzmienh gyavaiq hwnghat hanghmoeg sezsih giekdaej doxdam doxdoeng, haenqrengz gung-ganq aen dijhi hamj gyaiq daehyinh vuzliuz, gyavaiq cauhaeb aen muengx dieghawq、haij、mbwn、muengx “seiq aen itcaez” doxdam doxdoeng ndeu.

Boux cungcaiz hengzguh Cunghgoz–Dunghmungz Sinsizgangj Gujfwon Youjhan Gunghsw Ganh Cuihlingz naeuz, yaek nyinhcaenh gvancez guhsaed gij cijsi youqgaenj cungjsuhgi, yienq Dunghmungz gyavaiq dajcauh gizdieg ginghei susw moq, roengzrengz engq ndei bae hwnghat sezsih susw doxdam, coengh

gijsei Cunghgoz caeuq Dunghmungz doxdam doxdoeng doxyungz, engq ndei fugsah Cunghgoz caeuq Dungh-mungz cienzmienh doxgap.

“Siz Ginbingz daegbied gangj daengz aeu caez laeb diuzloh luz haij moq baihsae, guh buek hangh-moeg sezsih giekdaej gyaudoeng youqgaenj, aeu biucin sang、cizlieng sang bae hwnghat Diuz Yinhoz Bingzluz.” Boux dungjswcangj Bingz-luz Yinhoz Cizdonz Vangz Gezyinz naeuz, gyoengqde yaek caenhrengz guh gij goengcingz ndei、goengcingz saekheu、goengcingz seuqcingh. Aeu Diuz Yinhoz Bingzluz engq ndei bae “doeng diuz roen” “hailangh congh-cueng” “gyonjcomz canjnieb”, daiq-doengh gij swhyenz ndei henz roen diuz loh luz haij moq baihsae gyavaiq bienqbaenz ginghei hwnghat.

Dingh Gijvangq Dem Dan-canj, Hawj Engq Lai Binjbaiz Nungzyez “Cihhauh Gvangjsih” Youq Lajmbwn Mizmingz

Siz Ginbingz cungjsuhgi yinxok, yienh goengcingz giekdaej hwnghat aen guk nungzyez ak couh baengh saenqhwngh lajmbanj, aeu doeksaed gviveh、maenhsaed doicaenh.

Bi 2023, Gvangjsih lai laeb miz 110.4 fanh moux naz biucin sang, gijvangq doekceh、gij cungcanjlieng haeuxliengz laebdaeb seiq bi ndaej “song demlai”. Boux cujiyin Swcigh Dangjvej Nungzban、boux dinghcanj Nungzyez Nungzcunh Dingh、boux gizcangj Lajmbanj Saenqhwngh Giz Vangz Cijij gangj, baenzlawz cungj aeu dawz ndei diuz rap ancienz haeuxliengz, dawzyiemz guhsaed haeuxliengz ancienz dangj cwng caez dawzrap, haeujlaeg saedguh “youq dieg yo liengz、aeu gisuz yo liengz”, cienzmienh loengh rox baenzlawz hawj gohaeux haeuxyangz canj ndaej engq lai caeuq baenzlawz lailai daezsang gij dancan liengzyouz daengj gohuq cawjdaeuz, ceng guh aen swngj miz haeuxliengz lw lai ndeu.

Seizneix dwg sauh caqdan, 20 aen gih lenzhoz dajsou go’oij Aen Ciennieb Hozcozse Bozswng Nungzgi laeng Vujsenh Yen ngoenzngoeng cungj nyaengq bang bouxndaem’oij dajsou go’oij. Boux lijswcangj hoz-cozse Vuj Gijvei naeuz, cungjsuhgi byaij haeuj dieg go’oij、dangzcangj, haeujsim gij leih’ik bouxndaem’oij, neix hawj de engq miz saenqsim bae lenzhoz daiqdoengh bouxguhnaz、doidoengh nungzyez cienzdoengj cienjhingz swnggaep、hawj “saehnieb diemzvan” gemjnoix cingzbonj demlai yauqik.

8 bi gonq, bouxcoz Yungzyen

Bungz Yenj dauqma ranzmbanj, daj-ndaem 1.08 fanh moux makbugdiengz. De naeuz, cungjsuhgi daegbied dwen daengz aeu hawj engq lai binjbaiz nungzyez “cihhauh Gvangjsih” youq lajmbwn mizmingz, de yaek vihneix roengzrengz buekguh.

Couqmaenh Gij Eiqsik Caez-caemh Cunghvaz Minzcuz, Hawj Minzcuz Doxgiet Baenaj Byaij Youq Daengx Guek Baihgonq

Siz cungjsuhgi daegbied gangj daengz, Gvangjsih guh gak cungj hong swcigh yaek aeu couqmaenh gij eiqsik caezcaemh Cunghvaz Minzcuz guh sienqmeh, guh fueng’yiengq gaenbonj doicaenh hong cauhaeb minzcuz doxgiet baenaj, gyamaenh hwnghat aen daihbuenz yinzminz gak cuz doxgiet buekguh ndei haenx.

“Dou itdingh geiqmaenh gij vahdaengq cungjsuhgi, fugsah ndei vunzlai diegguenj daegbied dwg ‘bouxlaux bouxiq’, fugsah ndei giyez diegguenj, hawj segi bienqbaenz aen ranz hung raeujrub doxgiet doxyaez ndeu.” Boux suhgi dangjvej Nanz-ningz Si Banzlungz Segih Liuz Yenlinz gangj.

Aen mbanj guhyienh guh minz-cuz doxgiet baenaj daengx guk——Vanzgyangh Mauznanzcuz Swciyen Sw’wnh Cin Mbanjcinzsaengh miz cib lai aen minzcuz, boux suhgi dangj-cungcigh ndaw mbanj Veiz Bingzluz naeuz, gyoengqde yaek haeujlaeg “caez guenj hong ndaw dunz、caez guh swngcanj、doxaeu、caez biujyienj vwnzyi、caez ceihleix ancienz、caez cau binjbaiz”, doxgiet daiqlingx vunzlai gak cuz daengx mbanj yien fwngz itcaez baenaj.

Boux cujiyin Swcigh Minz-cunghvej Lij Cinlinz gangj, yaek lai comz rengz hong minzcuz Gvangjsih “gyawz ndei、gyawz guh、daezswng gyawz、gungroengz gyawz”, gij cwnghcwz minzcuz caeuq gij cidu dieg minzcuz gagguenj aendangj youq henz baihnaz gukcoj guh ndaej ndei, neix aeu gangj ndei、lwnh ndei, youq gij hainduj lizsij moq mbouj-duenh cauhaeb cingsaenz ranzmbanj Cunghvaz Minzcuz doxcaemh, son-gyauq dazyinx yinzminz gak minzcuz giendingh mbouj bienq gyo’mbaiq aencingz aendangj dingq vah aendangj riengz aendangj byaij, aeu gak minzcuz gvangqlangh doxyau dox baedauq doxyungz coicaenh hwnghat caezcaemh Cunghvaz Minzcuz, doi-doengh minzcuz doxgiet baenaj Gvangjsih byaij youq daengx guk baihgonq.

(faenzcieng daj 《Gvangjsih Yizbauq》genj aeu)